

MISYON N 2020

EN MEYER LAVI POUR TOU SESELWA

En regar lo lavenir lapes

Wavel Ramkalawan i dyalog ek peser Bel Ombre

Peser Bel Ombre i en group antreprenner ek travayer ki annan zot lendistri a-ker. Zot annan bokou lide lo ki manyer i kapab vin pli byen a lavenir, pour zot e pour pei.

Kandida prezidansyel LDS, Wavel Ramkalawan, ti annan en lesanz avek sa group dan en rankont semenn pase. In war li en dyalog tre enportan, an prenan kont ki sa lendistri i enn kritik pour nou pei. Msye Ramkalawan ti ganny akonpanyen par Ahmed Afif e Sandy Arisol.

Peser in pas lo serten lobstak ek difikilte ki zot fer fas avek e ki manyer zot kapab ganny rezourd. I kler ki en reorganizasyon fasilite e sevis pour sa lendistri i nesese.

Be en konsiderasyon prensipal ki zot in eksprimen se nesese pou anmenn en pe sekirite pour bann ki travay dan sa lendistri. Zot pe rod en program ki kapab kouver zot dan letan kot zot pa kapab lapes e osi pou en retret konfortab. Peser in fer kler ki zot pare pou kontribye, me zot tia kontan ki i annan en metod tax ki senp e fasil pour zot.

Zot pwen in byen ganny note e pou fer par dan tou refleksyon ki nou bann kandida prezidansyel i fer lo lavenir sa lendistri. Sa i pa zis pou lentere peser ek zot fanmir. Nou tou nou depan lo sa lendistri pour manze toulezour e pou deviz etranzer ki nou pei i bezwen.

Msye Ramkalawan i remersye bann peser pou zot lakey.



Zwenn kanpanny Wavel 2020

Pandan bann rali LDS, bann siporter ti adopte en slogan : **MON EN AKTIVIS LDS**. Sa ti laprev en sipor vreman remarkab.

Nou apel zot tou pou kontinyen fer sa vin vre. Pa tou ki kapab al marse dan distrik pou anmenn nou kanpanny prezidansyel kot lezot lakour. Me i fasil koz ek fanmir, vwazen ek zanmi lo sa eleksyon e akoz Seselwa i bezwen zwenn ansanm pour anmenn en nouvo direksyon pour nou pei.

Si ou en siporter aktivis, pa ezite antre dan kanpanny.



En MNA ki pe lager for pour son distrik

Nou dan LDS, nou pann ni vinn zwe, nou pa ni vin asize, bwar dite e apre al dan lakour. Nou'n vin travay e nou determinen pou delivre pour nou pei.

Enn bann priorite lekip LDS se pou amelyor lavi bann zabitan atraver bann pti proze ki gouvènmàn i kapab fer dan distrik. Pandan bokou lannen, sa bann proze in ganny fer zis avan eleksyon pou bat latet dimoun e anbet zot avek promes pou ganny zot vot. Nou nou pa travay koumsa.

Enn bann distrik kot son MNA pe vremen pouse se Anse Boileau. Menm si Onorab Arissol in vin pli tar ki lezot, deswit in fer tande son lavwa e presyon i aprezan lo gouvènmàn pou delivre.

Peser ek fermye Anse Boileau pe kontinyen fer fas avek bokou difikilte pou vann zot prodwi. Zot ankor pe asiz lo bor semen e sa pa akseptab. Final-



MNA Arissol pe negosye pou peser e fermye

man, Onorab Arissol in anmenn minis responsab pou ganny en solisyon. Nou ekspekte ki en desizyon final lo landrwa kot sa bazar pou ete i ganny fer oplivit.

Apre bokou zefor e perseverans, finalman zabitan Montagne Posee in ganny zot premye bus shelter. Sa fasilite in vin apre ki Onorab Arissol ti fer kontak avek lanbasad Lasin.

Plizyer lezot proze pe ganny negosye, sirtou renovasyon playground pour ki bann zanfan i ganny sa fasilite pou detann an sekirite.

En lapel avek STC pou rod marsandiz pli afordab

Lannan serten dimoun ki pe esey fann limer ki LDS i oule ferm STC. Sak eleksyon ki vini, zot fer menm zistwar pou esey fer per bann travayer dan sa konpanyen. Zot pe pran sa bann dimoun pou bann enbesil, me sa i pa leka.

LDS, parey tou-l-tan in fer, pe kontinyen ensiste ki STC i konsantre lo lenportasyon bann prodwi de baz a en meyer pri posib. Kalite i enportan, wi, me sa ki pli enportan se ki Seselwa i kapab peye, e ki Seselwa i kapab donn manze son zanfan.

Nou lapel se osi ki STC pa gat letan lo tou kalite prodwi, me ki i konsantre lo sa ki pli enportan. Danny Faure i dir nou ki avek 'Hypermarket', STC in donn nou en 'shopping experience'. Silvouple Msye, pa 'shop-



ping experience' ki nou pe rode me keksoz ki nou kapab met dan nou kasrol.

Nou lans en lapel avek tou travay STC pou pa tonm dan sa politik lafreyer sa zans, aköz nou, nou annan en vizyon pour sa konpanyen parastatal ki pe fer ki Seselwa i ganny sa ki zot bezwen a meyer pri posib.

Donn nou en pti nouvel



KASKADYEN

Ayoyo! Problemm dan kan! Sa ki pe rezenbe, sa ki pe menase, saki pe anvoy **I kler ki sa swa pou VP i pa enn ki'n desann byen.** Dapre koze, Sa onorab ki ti abitye tay 100 met pou zet son deal, la i pe vwar ki i pou bezwen tay 1 kilomet dan fore.

Lo lot kote, Dokter in fer byen kler pa kont lo li. I dir si zot rod li, zot pou regrete aköz dan son fanmiy zot kapab vir en sel kou. I ti fer zot mazine ki ler son frer ti al kot Top Pat, se li ki ti ganny sa latas pou al rod li en fer li trounen. "Pa pou ariv ankor ..."

Kant-a Vincent, in fer kler devan SBC e devan tou manm Lasanble Nasyonal ki li i pa pou fer okenn komanter lo sa ki in apel "**bann karikatir wikenn**". "**En kantite in pase, be ki wa fer...**", i ti dir byen fistre apre ki in ganny kit ater. Relman dirizan sa parti nepli konnen kot zot sorti e kot zot pe ale!

Zot ava rapel sa slogan ki Albert Rene ek son lekip ti lanse 20 an pase: **NOU ZANFAN, NOU TREZOR, NOU LAVENIR.** Eski sa prensip i ankor stenn ozordi? Bann zenn kin fini zot letid e kin kalifye pou en labours pe vwar zot dan en sitiasyon kot zot pa ni konnen si zot pou kapab al etidye. Silvouple, Minis, met en pe laklarte devan NOU TREZOR e zot ava kapab vwar en LAVENIR en pe pli briyan devan zot

Ozordi i annan plizyer dimoun ki pe regrete ki zot in siport sa parti SPPF dan lepase. Zot pe realize ki labi pouvwar e bann move desizyon pe fer annan bokou konsekans ozordi. Enn bann problemm se ki ler paspor e nasyonalite in ganny vann, sa bann nouvo Seselwa in konmans pran tou biznes aköz zot annan bokou larzan e bokou nou bann frer ek ser in ganny kit ater. **Ozordi i annan ki pe fer 'semafot'**. Nou konpran zot douler e nou pe envit zot pou donn lanmen pou anmenn sanzman. Dan LDS i annan plas pou tou Seselwa! Vini, vin zwenn nou!

Kaskadyen

Lanrezistremàn Voter i Kontinyen

Biro Komisyon Elektoral pe kontinyen avek larezistremàn voter. Dan letap ki pe vini zot pe propoze pour al pli pre ek tou kominote e ouver nouvo biro dan Sanmdi. Lo kote LDS, nou pe met tou zefor pou ankouraz bann ki pankor anrezistre, sirtou bann zenn, pou fer li. Eleksyon pe aproz vitman e napa bokou letan ki reste. Ler dat eleksyon i anonse, lanrezistremàn i fermen. Vote i drwa ek devwar tou sitwayen. I ou loportinite pou desid lavenir ou pei. Fer li konte.